

ԱՎԱՏԱՏԻՐԱԿԱՆ ՀԱՐԱԲԵՐՈՒԹՅՈՒՆՆԵՐՆ ԱՂՎԱՆՔՈՒՄ ԵՎ
ՔՐԻՍՏՈՆԵՈՒԹՅԱՆ ՀՈՉԱԿՈՒՄԸ ՈՐՊԵՍ ՊԵՏԱԿԱՆ
ՊԱՇՏՈՆԱԿԱՆ ԿՐՈՆ

ՀԵՆՐԻԿ ՍՎԱԶՅԱՆ

Ավատատիրական հարաբերություններն Աղվանքում ձևավորվել են IV դ.: Ճիշտ այս ժամանակաշրջանին են վերաբերում բացառապես վաղ միջնադարյան հայկական աղբյուրներում հանդիպող այն սակավ տվյալները, որոնք մատնանշում են նման հարաբերությունների առկայությունն Աղվանքում: Այստեղ դրանց գոյությունն փաստան առաջին անգամ արձանագրված է Աղվանքի արքա Ուռնայրի ճառում՝ ուղղված իր զինվորներին Ձիրավի ճակատամարտից (371 թ.) առաջ: «Յանձն լիցի ձեզ, – սլատվիրում է նա իր զինվորներին, – յիշելով ի ժամանակի՝ իբրև ձերբակալ արասցուք զգօրսն Յունաց, զբազումս ի նոցանէն ալրեցուսջիք, զի կալեալս կապեալս տարցուք յաղթանս՝ ի գործն կաւագործութեան, գաղատոս որմաշէնս պիտոյից մերոց քաղաքաց սպարանից և այլոց պիտոյից»²: Ինչպես իրավագիտըն նկատվել է պատմագրության մեջ, Ուռնայրի այս ճառի մեջ խոսքը գերիներին թագավորական ու նախարարական տիրույթներում բնակեցնելու և նրանց աշխատանքային ուժն այնտեղ օգտագործելու մասին է³: Ուրեմն, իր զինվորներին հրահանգավորելիս, Ուռնայրը ելել է Աղվանքում գործող այնպիսի հասարակարգի առկայությունից, որին հատուկ է հասարակության բաժանվածությունը սոցիալական առանձին խմբերի և հիմնված է հողի մասնավոր սեփականատիրական իրավունքի վրա: Իսկ այդպիսին ավատատիրականն էր, քանի որ դրան են բնորոշ նշված տարրերը:

Հայաստանին հարևան այս աշխարհում հասարակության սոցիալական բաժանվածություն է մատնանշում նաև Եղիշեն: Գրելով, որ Հայաստանում ռազմագնդերը կազմավորվում են ազատներից, ազատորդիներից ու ոստանիկներից, նա ավելացնում է, որ Աղվանքում և Վիրքում ևս գորադնդերը նույն ձևով էին կազմավորվում⁴, ինչը մեր վերն ասածի ասացուցույցն է: Մեղ հետաքրքրող երկրում, ավատատիրական հարաբերություններին հատուկ հասարակության շերտավորումը «ավագների» ու «կրտսերների» ցույց է տալիս Ղ. Փարպեցին պարսից արքա Հագկերտ II-ին (438–

¹ Ստ. Մալխասյանցո, *Ելնելով ձեռագրերից մեկի տարրնթերցումից, կարդում է «յԱղուանս» և դա ճիշտ է լտես Փաւստոսի Բուզանդացույ Պատմութիւն Հայոց (այսուհետև՝ Բ ու զ ա ն դ)*. Երևան 1987, էջ 439, ծանոթ. 168]:

² Բ ու զ ա ն դ, էջ 296:

³ А. П. Новоселъцев, В. Т. Пашуто, Л. В. Черепнин. Пути развития феодализма. М., 1972, с. 181.

⁴ Եղիշէի Վասն Վարդանայ և Հայոց պատերազմին. Երևան, 1989, էջ 20:

457 թթ) Վարդան Մամիկոնյանի տված պատասխանով. «Բազումք են յայս երից աշխարհաց, յաղատորերոյ, որք են աւագ քան զիս և գահու և աւուրբք և շատ են որ ի խոնարհ են»⁵: Աղվանքում, նշված ժամանակաշրջանում, նույնպիսի հարաբերությունների գոյությունն են ցուցում ուրիշ հայ պատմիչներ ևս, որոնք երկրի հասարակական կարգը, սոցիալական տարբեր խավերն ու սեփականության զանազան տեսակները նշելու համար օգտագործում են «թագաւոր» «նախարար», «նահապէտ», «ազատ», «չինական», «տանուտէր», «երդ», «ազգ», «ազդապէտ», «եկն-եկվոր», «կալուածք», «վիճակք», «սեպհական» և ավատատիրական հարաբերություններին հատուկ շատ այլ տերմիններ:

Հնագիտական պեղումներն, իրենց հերթին, գալիս են ապացուցելու արատադրության ավատատիրական եղանակի գոյությունն Աղվանքում: Դրանք լույս աշխարհ են հանել դյուղատնտեսական գործիքներ ու տնային գործածությունների, որոնք կատարելագործվածությունամբ ու մշակման տեխնիկայով տարբերվում են նախորդ շրջանի իրենց նմանակներից՝ և ակնհայտորեն ընդգծում են տնտեսական այն լուրջ տեղաշարժերը, որոնք տեղի էին ունեցել մինչ այդ տիրող արտադրական հարաբերություններում և պայմանավորել էին հին տնտեսակարգի ճղնաժամն ու նորի հաղթանակը:

Այսպիսով, IV դարում Աղվանքը թևակոխել էր իր զարգացման ավատատիրական փուլը, վերջինիս առանձնահատկություններով: Ինչպես հատուկ է ավատատիրական հարաբերություններին, Աղվանքում էլ հասարակությունը բաժանված էր երկու հիմնական, միմյանց ներհակ դասակարգերի՝ ավատատերերի, որոնք ընդհանուր առմամբ կազմում էին «ազատները» դասը և կախյալ ու ազատ գյուղացիների, որոնց սոցիալական կարգավիճակն արտահայտվում էր «անազատ» և սրան հավասարազոր «չինական» և «ռամիկ» տերմիններով: Տիրելով արտադրության հիմնական միջոցին՝ հողին, ավատատերերը իրենցից կախման մեջ դրեցին նյութական բարիքների անմիջական արտադրողներին՝ գյուղացիներին և ամեն կերպ ձգտում էին պահպանել իրենց գերիշխանությունը: Դրա համար նրանք օգտագործում էին բոլոր հնարավոր միջոցները և, առաջին հերթին, տնտեսական ու արտատնտեսական լծակներ: Սակայն տնտեսական հարկադրանքը գեռևս բավարար չէր ավատատերերի գերիշխանության լիակատար ասլահովման համար: Հարկավոր էր նույնը ամրապնդել նաև գաղափարասլես: Առաջանում է մի այնպիսի գաղափարախոսություն պահանջ, որն իրավական տեսակետից նույնպես «անազատներին» անարգել շահագործելու լայն հնարավորություն ընձեռեր և ավելին՝ արդարացներ

⁵ Ղազարայ Փարպեցույ Պատմութիւն Հայոց, Թուղթ առ Վահան Մամիկոնեան. Երևան, 1982, էջ 111-113:

⁶ И. М. Д ж а ф а р з а д е. Археологические разведки на Апшероне. — "Известия" АН АзССР, 1948, N 6, с. 81—94; С. М. К а з и е в. Археологические памятники Мингечаура как исторические памятники для изучения истории Азербайджана. — "Известия" АН АзССР, 1950, N 7, с. 167—180; О. Ш. И с м и - з а д е. Ялойлутепинская культура. Баку, 1956; Г. М. А с л а н о в, Р. М. В а и д о в, Г. И. И о н е. Древний Мингечаур. Баку, 1959.

այն: Այդպիսին Աղվանից իշխող վերնախավի համար եղավ քրիստոնեությունը և նա շտապեց կյանքի կոչել այն:

Նոր ժամանակներ էին սկսվել նաև Աղվանքի քաղաքական կյանքում: IV դ. 30-ական թվականներին, ի դեմս Վաչագան I Քաջի, թագավորության գլուխ էր անցել Արշակունյաց հարստությունը⁷ և պետություն ու նորահաստատ արքայատոհմի դիրքերն ամրապնդելու եռանդուն ջանքեր էր գործադրում: Ամուր դիրք ու կենտրոնացված պետություն ունենալուն ուղղված Արշակունիների գործունեությունը պահանջում էր նաև համապատասխան դադափարական հիմնավորում: Դա կարող էր անել քրիստոնեությունը՝ հպատակներին հնազանգության կոչ անելու իր պատվիրաններով: Ուստի, շահագրգիռ խափը չէր կարող չհկատել քրիստոնեության գերը պետական կարևորություն ներկայացնող այս գործում և նրան պաշտոնական բնույթ չհաղորդեր:

Երկրի հոգևոր կյանքում նույնպես ի հայտ են դալիս նոր երևույթներ: Զարգանում է հասարակական միտքը: Քրիստոնեությունը, որի մասին առաջին պատկերացումները կազմվել էին II դ. սկզբներին թագետս առաքյալի աշակերտ Սր. Եղիշայի միջոցով և ձև ու բովանդակություն ստացել Գրիգոր Լուսավորչի թոռան՝ Մանուկ Գրիգորիսի գործունեությամբ⁸, անցնելով ևրկար ու դժվարին ուղի, ուսումնասիրվող ժամանակաշրջանում արդեն իր տեղն ունեն հասարակության գիտակցության մեջ, գնալով ամրապնդվում էր և, հանդես դալով որպես աղքատների ու զրկվածների կրոն, ժողովրդական նորանոր դանգվածներ ընդգրկում վերջիններիս համար դառնալով հոգևոր բավարարման միջոց: Երկրում առաջացել և հաջողությամբ գործում էին քրիստոնեական համայնքներ և, ամենայն հավանականությամբ, նաև կրոնական հաստատություններ:

Այսպիսով, քրիստոնեությունը թափանցել էր Աղվանքի հասարակական կյանքի բոլոր ոլորտները և յուրաքանչյուր խավի համար ստացել յուրովի կարևորություն: Հասունացել էր այն պետական պաշտոնական կրոն հռչակելու ժամանակը: Դրա համար առկա էին տնտեսական, քաղաքական և հոգևոր անհրաժեշտ նախադրյալները, որոնք ուժ էին ստանում նաև այնպիսի արտաքին կրոնաքարոյական գործոնի ազդեցությամբ, ինչպիսին քրիստոնեության վաղուց արդեն պետական կրոն լինելն էր հարևան Մեծ Հայքում և Վիրքում: Եվ աչքի առաջ ունենալով քրիստոնեություն ընդունած հայերի օրինակը, առաջինը Աղվանքի Ուռնայր արքան է ճիշտ ըմբռնում նոր կրոնի նշանակությունը երկրի կյանքում և հանգում տյն ընդունելու գաղափարին: Մ. Կաղանկատվացին բերում է հայոց Գյուլտ Արահեղացի կաթողիկոսի (461–478 թթ.) նամակն ուղղված Աղվանքի թագավոր Վաչեին, որտեղ պարզեփպարդ ասված է այդ մասին: «Յառաջադուլին սէրն Քրիստոսի բնա-

⁷ Հ. Սվազյան. Աղվանից թագավորության Արշակունյաց ճյուղի սկզբնավորումը. – «Բանբեր Հայաստանի արխիվներին», 1977, N 3, էջ 158–170:

⁸ Հ. Սվազյան. Սր. Եղիշան Հայոց Արևելից կողմանց, Չոդա երկրի և Աղվանից աշխարհի լուսավորիչ. – «Լրաբեր հաս. գիտությունների», 2000, N 2, էջ 55–65: Ն ու յ ն ի՝ Քրիստոնեության Աղվանք ներթափանցման ուղիներն ու ժամանակաշրջանը. – «Պատմա-բանասիրական հանդես», 2002, N 2, էջ 131–141:

կեաց ի նախնեւոյն ձերուս Ուռնայրի, — գրուս է հայոց կաթողիկոսը Աղվանից արքային և մանրամասնում, — նախանձ երկնաւոր եբեր ընդ Տրդատայ Հայոց արքային, իբրև լուաւ զմեծամեծ սքանչելիսն Աստուծոյ, որ ի ձեռն սրբոյն Գրիգորի նշանք և արուեստք գործեցան յաշխարհին Հայոց, վալվաղակի դառնալ սոցա ի բազումս շաւղաց մոլար ճանապարհին առ մի ճշմարիտն Աստուած»⁹:

Ուռնայր արքան շտապում է Հայաստան մեծ շքախմբով, նախարարների բազմութեամբ ու զորքով (անշուշտ թիկնազորով), ներկայանում հայոց թագավորին ու կաթողիկոսին (Մ. Կաղանկատվացու և Կ. Գանձակեցու ասելով՝ Տրդատին և Գրիգոր Լուսավորչին¹⁰, որը, ինչպես կտեսնենք, ճիշտ է): Այստեղ նա քառասունօրյա պահքով և աղոթքներով ձերբազատվում է հեթանոսական մոլորութուններից, խորամուխ լինում քրիստոնեական ուսմունքի խորհուրդների մեջ, ու հիսուներորդ օրը մկրտվում-ձերբազատվում է հեթանոսական մոլորութուններից¹¹ և վերադառնում իր երկիրը: Նրա հետ հայոց թագավորը մարդիկ է ուղարկում, որոնք պետք է որ օգնեին նրան Աղվանքում քրիստոնեութան ամրապնդման գործում¹²: Վերադառնալով Աղվանք, նորազավան թագավորը սկսում է նախապատրաստական աշխատանքներ տանել նոր կրոնին պաշտոնական բնույթ տալու համար: «Եկն Ուռնայր արքան, — գրում է Մ. Կաղանկատվացին, — եմուտ յաշխարհդ Աղուանից ուստից և կատարեաց զնոսա առաքելական կանոնօք»¹³: Նման ձեռնարկումներով կայուն հիմք ստեղծելով, Ուռնայրը քրիստոնեութունն Աղվանքում հռչակում է պետական պաշտոնական կրոն¹⁴:

Ընդունելով հանդերձ, որ Ուռնայրն էր աղվանացիների դարձի հողևոր հայրը, ուսումնասիրողները¹⁵, սակայն, միակարծիք չեն ո՛չ նրա գահակալութեան տարիների և ո՛չ էլ Աղվանքում քրիստոնեութան ընդունման տարեթվի մասին: Պատմիչների հաղորդումների համաձայն, Աղվանից այս թագավորը Հունաց Կոստանդինոս կայսեր (306-337 թթ.), Հայոց Տրդատ III Մեծ թագավորի (298-330 թթ.) և Գրիգոր Լուսավորչի (252-325 թթ., կաթողիկոս էր 301-325 թթ.) ժամանակակիցն էր, իսկ քրիստոնեութունն էլ այս երեք երկրներում հաղթանակել էր միաժամանակ («Եւ այսք ի միում ժամանակի եղեն հրաշք յաստուածուստ»¹⁶): Հիմք ընդունելով պատմիչների հաղորդումները, ուսումնասիրողները գտնում են, որ Ուռնայրը Աղվանքում գահակալել է IV դ. սկզբնե-

⁹ Մ ո վ ս ե ս Կ ա ղ ա ն կ ա տ վ ա ճ ի. Պատմութիւն Աղուանից աշխարհի (այսուհետև՝ Կաղանկատվացի). Երևան, 1983, էջ 18:

¹⁰ Կ ի Ր ա կ ո ս Գ ա ն ձ ա կ ե ց ի. Պատմութիւն Հայոց (այսուհետև՝ Գ ա ն - ձ ա կ ե ց ի). Երևան 1961, էջ 193:

¹¹ Կ ա ղ ա ն կ ա տ վ ա ճ ի, էջ 19-20:

¹² Նույն տեղում, Գ ա ն ձ ա կ ե ց ի, էջ 193:

¹³ Կ ա ղ ա ն կ ա տ վ ա ճ ի, էջ 20:

¹⁴ «Այց արար Աստուած ազգի մարդկան՝ ընդհանուր ծաղկեցոյց զարևմտեայ կոյս մեծ կայսերքն Կոստանդինոսիւ, լուսաւորեաց զՄեծ Հայս երանելեաւն Տրդատաւ: Ած ի հաւատս և զեյս, արեգականն, որ սակաւ ինչ ծանուցեալ էին զծագումն փրկութեան ճշմարիտ արեգականն: Կրկնակի ընդ ձեռն Ուռնայրի գերագոյն լուսաւորեցան» (Կ ա ղ ա ն - կ ա տ վ ա ճ ի, էջ 14):

¹⁵ Բացառութիւն է կազմում Ա. Հակոբյանը, որի մասին կխոսվի ստորև:

¹⁶ Կ ա ղ ա ն կ ա տ վ ա ճ ի, էջ 14, Գ ա ն ձ ա կ ե ց ի, էջ 193:

րին: Ք. Պատկանյանն, օրինակ, ցույց է տալիս նշված դարի 1-ին քառորդը¹⁷, իսկ Մ. Բարխուտարյանցը նույնիսկ ստույգ տարեթիվ է նշում. «Ուռնայր գահակալած է երևում Տրդատի Հաճութեամբ, մօտաւորապէս Փրկչական 300–301 թուականին»¹⁸: Ֆ. Մամեղովան նրա թագավորութեան տարիներ է համարում 313–371 թթ.¹⁹:

Ուռնայրին դիտելով IV դ. սկզբների գահակալ, ուսումնասիրողները նրա անվան հետ կապված պատմական հայտնի շրջադարձի ժամանակաշրջանը, բնականաբար, որոշելու էին նրա թագավորած տարիների շրջանակում: Այսպես, Մ. Բարխուտարյանցը, ճիշտ է, որևէ տարեթիվ չի նշում, բայց Աղվանքում դավանափոխութեան ողջ պատմութիւնը ներկայացնում է իբրև հիշյալ ժամանակների դեպքեր²⁰, Ֆ. Մամեղովան արդեն ցույց է տալիս ստույգ թվական՝ 313²¹, իսկ ըստ Ռ. Գեյոլեւի նույն իրադարձութիւնը տեղի է ունեցել Գրիգոր Լուսավորչի կենդանութեան օրոք մինչև 326 թ.²²:

Աղվանքում քրիստոնեութեան ընդունման տարի Ա. Հակոբյանը համարում է 315 թ.: Գրա համար նա ելակետ է ընտրել Ագաթանգեղոսի «Հայոց պատմութեան» հոնարեն խմբագրութեան (Սր. Գրիգորի Վարքի) այն տեղեկութիւնը, որի համաձայն Գրիգոր Լուսավորչը Աղվանք է ուղարկել թովմաս անունով մեկին²³: Վերջինիս կարգելով Աղվանքի առաջին եպիսկոպոս և գանելով, որ թովմասը Աղվանք է ուղարկվել Լուսավորչի՝ Կեսարիայից 314 թ. վերադառնալուց հետո հաջորդ տարում, եզրակացնում է, որ 315 թ. էլ քրիստոնեութիւնն Աղվանքում ճանաչվել է որպես պետական կրոն, ընդ որում ոչ թե Ուռնայրի, այլ անունով անհայտ մի ուրիշ թագավորի կողմից²⁴:

Միանգամից ասենք, որ առաջարկված և ոչ մի տարեթիվ, որպես Աղվանքում տեղի ունեցած շրջադարձային իրադարձութեան թվական, իրական չենք համարում: Մասնավորապես ճիշտ չէ դրա համար հիմք ընդունել Սր. Գրիգորի Վարքից քաղված տեղեկութիւնը, քանի որ նրանում սոսկ ասվում է, թե Գրիգոր Լուսավորչը թովմաս անունով մի անձնավորութեան է ուղարկել Աղվանք: Իսկ նման հիմքից բոլորովին էլ չի հետևում, թե նա Աղվանք է ուղարկվել իբրև եպիսկոպոս, որ համարվի առաջինը երկրում: Եվ դա այն դեպքում, երբ մյուս հայկական աղբյուրները, որոշակիորեն, հատուկ չեչտեղով

¹⁷ К. П а т к а н я н. История агван Моисея Каганкатваца, писателя X в. СПб., 1861, с. 305.

¹⁸ Մ. Բ ար խ ու տ ար յ ա ն ց. Պատմութիւն Աղուանից. Հ. Ա., Վաղարշապատ, 1902, էջ 55:

¹⁹ Ф. М а м е д о в а. Политическая история и историческая география Кавказской Албании. Баку, 1986, с. 186.

²⁰ Մ. Բ ար խ ու տ ար յ ա ն ց. նշվ. աշխ., էջ 56–58:

²¹ Ф. М а м е д о в а. նշվ. աշխ., էջ 186, 228:

²² Р. Б. Г е у ш е в. Христианство в Кавказской Албании. Баку, 1984, с. 29.

²³ G. G a r j i t t e. Documents pour L'etude du livre d'Aganthe. Citta del Vaticano, 1946, p. 101-102.

²⁴ А. А А к о п я н. Албания – Алуанк в греко-латинских и древнеармянских источниках. Ереван, 1987, с. 125 – 126.

կրոնական աստիճանը, Աղվանքի եպիսկոպոս և, նույնիսկ, կաթողիկոս, առաջինը նշում են Մանուկ Գրիգորիսի անունը:

Դատելով Գրիգոր Լուսավորչի գործունեությունից, որ քրիստոնեություն տարածելու նպատակով քարոզիչներ էր առաքում Հարևան երկրներ, կարելի է վստահորեն ասել, որ սույն թովմասն Աղվանք է դնացել քարոզչական աշխատանքներ տանելու: Դա հաստատվում է նույն հաղորդման հաջորդ տողերով, ուր գրված է, որ հայոց հայրապետը միաժամանակ մարդիկ է ուղարկել Վիրք (Իրենարքոսին) և Լազերի երկիր (Սոփրոնիոսին)²⁵, որտեղից պարզից էլ պարզ երևում է, որ վերջիններս (նրանց հետ և թովմասը) ընդամենը քարոզիչներ էին, և Գրիգոր Լուսավորչի հանձնարարություններ ուղարկվել էին տարբեր երկրներ: Իգուր չէ, որ ոչ մի հետազոտող սրանից այնպիսի հետևություն չի արել, թե հիշյալ երկրներում քրիստոնեությունը այս փաստով հուշակվել է պետական կրոն:

Այսպիսով, թովմասը քարոզիչ էր և գործում էր Աղվանքում մինչև այստեղ քրիստոնեության ընդունումը: Հակառակ պարագայում «Վարքի» հեղինակը ավելի շուտ կնշեր, այն էլ անվանապես, թագավորին (որպես կարևոր այդ իրադարձության գլխավոր դեմքի, և դա բնական կլիներ), քան ոմն թովմասի, ընդամենն նրան պարուրելով անորոշության շղարշով: Այնպես որ, եթե նույնիսկ ընդունելու լինենք, թե թովմասը իսկապես Աղվանք է ուղարկվել Լուսավորչի 314 թ.²⁶ Կեսարիայից վերադառնալուց հետո հաջորդ տարում՝ 315 թ., դարձյալ ճիշտ չի լինի վերջին թվականը դիտել որպես Աղվանքում քրիստոնեության ընդունման տարեթիվ:

Ինչ վերաբերում էր հարցի առնչությանը արտահայտված մյուս տեսակետներին, ասյա կարելի էր հավատալ թե՛ պամիչին և թե՛ նրա տեղեկության վրա հեցող ուսումնասիրողներին, եթե մյուս հայ պատմիչները՝ Մ. Խորենացին, Փ. Բուղանդն ու նաև ինքը՝ Մ. Կաղանկատպան չհիշատակեին նույն Ուռնայրին, որպես Պապ թագավորի (370–374 թթ.) ժամանակակիցն ու Շապուհ II պարսից արքայի դինակիցը Ձիրավի հայանի ճակատամարտում (371)²⁷, որով սարօրեն երկարում է նրա թագավորության շրջանը: Առաջվում է այնպես, որ դեռևս դարասկզբին թագավորելու տարիք ունեցող այս Ուռնայրը նույն դարի 70-ական թվականներին այնքան կորովի էր, որ նույնիսկ պատերազմների էր մասնակցում: Չնայած գրա անհնարինությունը, Ֆ. Մամեդովան հավատում է գրան, օրինակ բերելով Շապուհ Երկարակյացի թագավորության տեական ժամանակամիջոցը²⁸: Բայց ուսումնասիրողն անտեսում է այն սլարազան, որ Շապուհ II-ի գահակալության երկարատևությունը գեռ օրորոցից թագավոր հուշակվելու հետևանք էր և

²⁵ G. G. Garitte. Նշվ. աշխ., էջ 102-104, 127:

²⁶ Տարեթվի մասին տե՛ս Պ. Ա ն ա ն յ ա ն. Սուրբ Գրիգոր Լուսավորչի ձեռնագրության թուականը և պարագաները. Վենետիկ, 1960, էջ 146-170, որն էլ, որպես ճշգրտված թվական, ընդունել է Ա. Հակոբյանը (տե՛ս նշվ. աշխ., էջ 126 ծան. 7):

²⁷ Մ ո վ ս է ս Խ ո Ր Ե Ն Ա Գ Ի. Պատմություն Հայոց. Երևան, 1991, էջ 304, Բ ո լ գ ա ն դ, էջ 294-296, Կ ա ղ ա ն կ ա տ վ ա ց ի, էջ 30-31:

²⁸ Փ. Մ ա մ Ե Վ Օ Վ ա. Նշվ. աշխ., էջ 261, ծանոթ. 48:

չի արտացոլում նրա կառավարման ինքնուրույն շրջանը, քանի որ մինչև Հասունանալը և անձամբ թագավորելը երկրում իշխում էր մայրը²⁹: Մինչդեռ Ուոնայրը Տրդատի ու Կոստանդիանոսի օրոք ինքը պետք է կանգնած լիներ պետութայն ղեկին, որ փոխհարաբերությունների մեջ մտներ նրանց հետ: Ձիրավի ճակատամարտում կռվող Ուոնայր արքան IV դ. սկզբներին ոչ միայն նման փոխհարաբերությունների մեջ մտնելու տարիքի չէր, այլև թագավոր էլ չէր: Ուսումնասիրությունները պարզել են, որ Ուոնայրի ենթադրյալ թագավորության շրջանում 30-ականներից մինչև 50-ականների վերջը, Աղվանքում միայնց հաջորդելով թագավորել են Վաչագան I Քաջը և Վաչե I-ը, որոնց պատմականությունն ասլացուցվել և թագավորության ժամանակաշրջանը ճշտվել են նույն տարիներին տեղի ունեցած պատմական անցուղարձեռով³⁰:

Այսպիսով, միանգամայն սխալ է Ուոնայրի դահակալումը հաշվել դարասկզբից և այդ սխալ հիմքով որոշել Աղվանքում քրիստոնեություն ընդունման ժամանակը:

Նկատի ունենալով, որ Վաչագան I-ի և Վաչե I-ի թագավորության շրջանը հասնում էր մինչև IV դ. 50-ական թվականների վերջերը, իսկ 371 թ. Ձիրավի ճակատամարտում Ուոնայրը հիշատակվում է արդեն թագավոր, կարելի է մակարեբել, որ վերջինս Աղվանքում գահ է բարձրացել մինչև 70-ական թվականները, շուրջ 60-ականների սկզբներին և ոչ մի գեպքում ղրանից չուտ: Այլ խոսքով՝ Աղվանից այս թագավորը Հայոց Արշակ II (350–368) և Պապ (370–374) թագավորների ժամանակակիցն էր³¹, և ոչ թե Տրդատ III-ի և Կոստանդիանոսի, որ, ելնելով Մ. Կաղանկատվացու հաղորդումից, սխալմամբ կարծել են ուսումնասիրողները³²:

²⁹ Е. К р ы м ц к и й. История Сасанидов. М., 1904, с. 37.

³⁰ Г. С. С в а з я н История страны Алуанк (с древнейших времен по VIII в.) Автореф. дис. на соискание ученой степени доктора ист. наук, Ереван, 1991, с. 29–30. Կաղանկատվացին էլ Աղվանքի թագավորների իր ցանկում Ուոնայրին հիշատակում է Վաչագան I Քաջից և Վաչե I-ից հետո (տե՛ս Կ ա ղ ա ն կ ա տ վ ա զ ց ի, էջ 41):

³¹ Այստեղ ճիշտ է Ա. Հակոբյանը, որը Ուոնայրին համարում է Պապի ժամանակակիցը (տե՛ս А. А к о п я н. Նչվ. աշխ., էջ 127):

³² Կան ուսումնասիրողներ, որոնք նկատել են, որ Ուոնայրի մասին Կաղանկատվացու հաղորդումներից առաջանում է մեկ թագավորի համար գահակալության անօրինակ երկար շրջան և փորձելով հարթել այդ անհամապատասխանությունը, Ուոնայր անունով երկու թագավոր են ենթադրել, որոնցից մեկը իբրև թե կառավարել է IV դ. 30-ական թվականներին, մյուսը՝ նույն դարի 70-ական (տե՛ս Հ. Ա ճ ա ո յ ա ն. Հայոց անձնանունների բառարան. Հ. Դ, Երևան 1948, էջ 204: Ն. Ա կ ի ն յ ա ն. Մովսես Դասյուրանցի (կոչված Կաղանկատվացի) և իր պատմությունն Աղվանից. Վենետիկ, 1970, էջ 61): Գրելով, որ Աղվանքում գահակալել է Ուոնայր անունով կա՛մ երկու թագավոր, կա՛մ մեկը՝ 60–70-ական թվականներին, բայց և գտնելով, որ աղբյուրների հաղորդումները կասկած Ուոնայրի քրիստոնեական գործունեության հետ, հասնում են մինչև 326 թ. իսկ քրիստոնեությունն էլ Աղվանքում հռչակվել է պետական կրոն, նախքան այդ թվականը, Ռ. Գեյուլը ևս, այնուամենայնիվ, Ուոնայրին դարձնում է IV դ. առաջին քառորդի գործիչ և փաստորեն նրան վերագրում շուրջ 70 տարվա գահակալություն (տե՛ս Р. Г е ю ш е в. Նչվ. աշխ. էջ 29): Սակայն ճիշտ չեն այսպիսի ենթադրությունները, քանի որ, ինչպես տեսանք վերևում, մինչև դարի առաջին կեսի վերջերը (գուցե և ավելին) Աղվանքում թագավորում էին Վաչագան I-ը և Վաչե I-ը: Իրականությունն այն է, որ եղել է Ուոնայր անունով միայն մեկ թագավոր և նա էլ գահակալել է, կրկնում ենք, 4-րդ հարյուրամյակի երկրորդ կեսից սկսած:

Պարզելով, թե երբ է Ուռնայրը Աղվանքում անցել թագավորության գլուխ, դժվար չէ որոշել նաև քրիստոնեությունը ընդունման ժամանակաշրջանը, քանի որ, հասկանալի է, միայն դա՛հ բարձրանալուց հետո նա կարող էր իրականացնել իր մեծ առաքելությունը: Պետք է ընդունել նաև, որ նա անմիջապես չէ, որ ձեռնամուխ է եղել երկրի հոգևոր վերափոխման խնդրին, մանավանդ որ նրա թագավորության սկիզբը ընթանում էր խռովահույզ իրադարձությունների բովով:

Ուռնայրի թագավորելով հայ-աղվանական հարաբերությունները մտնում են նոր փուլ: Այս շրջանում Ուռնայրը հանգես է գալիս որպես պարսից Շապուհ II արքայի դաշնակիցը և նրա քաղաքականության իրագործողը անդրկովկասյան երկրներում: Եվ օգտվելով 60-ական թվականներին Հայաստանում ստեղծված ծանր վիճակից նա, հավանաբար, Շապուհի սադրանքով, հարձակվում է հայոց վրա և նրանցից դրավում Ուտի-Առանձնակ, Շակաշեն, Գարդման, Կողթ գավառները և սրանց մերձակա շրջանները՝ «և այլ որ շուրջն էին զնովալ»³³: Այնուհետև Ուռնայրին տեսնում ենք Ձիրավի ճակատամարտում Շապուհ II-ի կողքին, որի հետ էլ նա պարտվում է և նույնիսկ վիրավորվում սպարապետ Մուշեղ Մամիկոնյանի ձեռքով³⁴:

Ձիրավի ճակատամարտից հետո էլ Աղվանքում քաղաքական իրավիճակը կայուն չէր: Այս անգամ Մուշեղ Մամիկոնյանն է հարձակվում նրա վրա և վերանվաճում Հայաստանից խլված տարածքները, դրանք միավորում մայր երկրի հետ և Կուր գետը կրկին սահման դարձնում երկու երկրների միջև, որն այդպիսին էր նաև մինչ այդ: Բուզանդը գրում է. «Առնէր պատերազմ (Մուշեղ Մամիկոնյանը – Հ. Ս.) ընդ երկիրն Աղուանից, հարկանէր զնոսա ի հարուածս անհնարինս: Եւ թափէր ի նոցանէ բաղում դաւառս, զոր հասեալ էր նոցա ի նոցանէն. զՈւտի, զՇակաշէն և զձորն Գարդմանայ, զԿողթ և այլ որ շուրջն էին զնովալ սահմանք, գաւառք: Եւ զԿուր գետ՝ որպէս և յառաջն լեալ էր, ընդ երկիրն Աղուանից և ընդ երկիրն իւրեանց սահման արարեալ կացուցանէին»³⁵:

Մուշեղ Մամիկոնյանի կողմից Հայոց և Աղվանից միջև նախկին սահմանի վերականգնումից ու վերջինիս հպատակեցումից հետո, երկրում սկսվում է խաղաղության մի շրջան, որը քաղաքական կայունացման և սոցիալ-տնտեսական կյանքի աշխուժացման հետ մեկտեղ բերում է նաև հասարակական մտքի զարթոնք ընդհանրապես և դրա ոլորտում քրիստոնեության մասնավորապես: Խաղաղ պայմաններում իրեն զգացնել է տալիս վերջինիս, որպես նոր հասարակարգում հարաբերությունների կարգավորման միջոցի, անհրաժեշտությունը ու պահանջ գնում այն հասցնել պետական կրոնի աստիճանի: Եվ Ուռնայրը այսքանից հետո գեռ նոր մեկնում է Հայաստան, մկրտվում այստեղ, ծանոթանում քրիստոնեության խորհուրդներին և վերադառնալով Աղվանք իր երկ-

³³ Բ ու զ ա ն դ, էջ 322:

³⁴ Խ ո Ր Ե ն ա ց ի, էջ 304, Բ ու զ ա ն դ, էջ 294-296, Կ ա դ ա ն կ ա տ վ ա ց ի, էջ 30-31:

³⁵ Բ ու զ ա ն դ, էջ 320-322:

րում քրիստոնեությունը հռչակում պետական պաշտոնական կրոն: Դատելով վերոշարադրյալից, նա դա կարող էր անել միմիայն նկարագրված անցուղարձներից հետո՝ մոտ 70-ական թվականների կեսերին:

Իր այս առաքելական գործով աղվանից արքան նմանվում է Հայոց Տրդատ III թագավորին և հունաց կայսր Կոստանդինոսին, որոնք նույնպես քրիստոնեությունը պաշտոնական բնույթ տվեցին իրենց երկրներում: Նշված իմաստով, նա, ամենայն իրավամբ, կարող է դասվել իր մեծ նախորդների կողքին և, հավանական է, գուցե և իրական, հենց այս հանգամանքն էլ ձեռնդ է տվել նրան ընդհանուր Մեծի և Կոստանդինոսի ժամանակակիցը լինելու վարկածին, որը, չնայած ժամանակավրեպությանը, ուսումնասիրողները ընդունել են որպես ճշմարտություն:

Այսպիսով, քրիստոնեությունն Աղվանքում պետական կրոն է հռչակվել IV դ. 70-ական թվականների կեսերին Ուռնայրի կողմից, որն իր մկրտությունն ստանալով Հայաստանում, այդուհետ Հայոց կաթողիկոսների կողմից Աղվանից Հայրապետների ձեռնադրման կարգի սկիզբն է դնում³⁶:

ФЕОДАЛЬНЫЕ ОТНОШЕНИЯ В АГВАНКЕ И ПРОВОЗГЛАШЕНИЕ ХРИСТИАНСТВА ГОСУДАРСТВЕННОЙ ОФИЦИАЛЬНОЙ РЕЛИГИЕЙ

ГЕНРИК СВАЗЯН

Р е з ю м е

Феодалные отношения в Агванке сформировались в IV в. Новый общественный строй требовал идеологии, которая укрепляла бы господствующую роль феодалов. Этой идеологией стало христианство. Царем Агванка Урнайром вскоре оно было объявлено государственной религией. В историографии нет единого мнения о дате принятия христианства в Агванке. Исследования показали, что в первой четверти IV в. страной правили цари: Вачаган I Храбрый и Ваче I. Урнайр же последовал за ними в 60-е годы того же века. Исследователи, исходя из сообщений М. Каганкатвацци, что Урнайр якобы был современником армянского царя Трдата III Великого, Григора Просветителя и римского царя Костандина, выдвинули разные даты христианизации страны. По нашему мнению это могло быть не раньше середины 70-х годов. Являясь первым агванским христианским царем, Урнайр уподобился армянскому царю Трдату III и Костандину, которые также явились первыми христианскими царями в своих странах. Это обстоятельство и послужило поводом, чтобы представить его современником своих армянского и римского предшественников. Таким образом, в Агванке христианство было провозглашено государственной религией в середине 70-х годов IV века царем Урнайром, который сам получил свое крещение в Армении и установил, что агванские католикосы рукополагались главами армянской церкви.

³⁶ Կ ա ղ ա ն կ ա տ վ ա ղ ի, էջ 15: